

## Beilage I.

### Stiftungsurkunde der Landesschule Meissen (nach dem im Schularchiv befindlichen Original).

In dem Namen des Allmechtigen Gottes Amen. Von desselben Gnaden Wier Mauritius Herzog zu Sachsen Landgraff Inn Düringen vnd Marggraf zu Meissen, Bekennen vnd thuen kundt, vor uns, den Hochgebornenn Fürsten Hern Augustum Herzogen zu Sachsen Landgrafen in Düringen vnd Marggrafen zu Meissen, vnsern freuntlichenn liebenn Brudern vnd vnser beyder Erben vnd Nachkommen allermenniglichen zu Ewigen gezeiten. Nachdeme unsere auch vnserer vnderthanen vorfahren seliger gedechtnis, aus anacht, die sie zu Got gehabt, Etliche gutter zu Sammen getragen gestiftet vnd geordenet, daß der Allmechtige durch die Ordenspersonen, vnd andere so dieselben zugebrauchen gehapt, solte gelobt vnd gepreyset werdenn, vnd aber daraus mergliche Irthumb vnd mißbreuche erfolget, Wie dan menniglich wißlich, vnd am tage, vnd aber vns als einem Christlichen Regenten dasselbige Inn vnserenn landen lenger zugestaten nicht gepuren wollen, Haben wier betrachtet, welcher gestalt, Sölliche gutter Got zu lobe In andere Christliche vndt milde sachen funthen angewendt werdenn vnd derhalben den ausschus vnserer Lande Düringen vnd Meissen, zu vns erfordert, vnd sampt Inen bewogen, das eynem yden lande nichts so hoch vonnöten, als das die Jugentt In Gottes forchte, Ime zu Lobe erzogen, vnd In den Sprachen vndt guttenn kunsten vnderweiset werde, daraus dan erfolget, das gelerte kirchen vnd andere des gemeinen nutzess diner auferzogen vnd zu bekomen sein, Ane welliche die Christliche gemeine Rechtschaffen nicht kann gelert noch regirt werden, Derhalben haben wier mit demselben Ausschus beschlossenn, weil vor vnser Regirung, vnd sider des inn vnsern Landen etliche Clöster ledig wordenn, das wier die darzu gehorenden gutter zu söllichen milden sachen, vnd Gottes lobe, wider wollen anwenden, vnd in vnsern landen drey Schulen stifften, wie wier dann dasselbige in einem offenen drucke haben ausgehen lassen, vnd weyl die eine schule zu Meissenn in sant Affran Closter sein sal, So ordenen, Setzen vnd wollen wier hiermit, kraft diß brifes, daß nachuerzeichente Zinße vnd